

# S'Ufitziu limba sarda torrat a abèrrere

Si fàghet ischire a sa populazione ca in su Comunu nostru at torradu a abèrrere s'isportellu linguisticu subra comunale. S'Amministrazione comunale, cunforma a is normas europeas, natzionales e regionales chi pertocant s'amparu de is limbas de minoria, cun custu Isportellu de sa limba sarda punnat a:

- sighire una politica linguistica crara e profetosa, chi siat capassa de s'ispaniare su manigiu de sa limba sarda in totu is setores de sa vida pùblica de sa comunidade;
- pònnere, a manera ufiziale, sa limba sarda in totu is cuntostos de impreu, sena de s'iscarèssere s'Amministrazione Pùblica;
- traballare a manu de pare cun is Comunos, Entes territoriales, Iscolas e Assòtzios, pro chi is interventos in agiudu a su sardu non siant ispipirados o ocasionales, ma siant profetosos pro torrare a manigiare sa limba sarda in su iscriere e in su chistionare. Comente a is àteros annos, s'Ufitziu limba sarda de Baressa est in su primu pianu de sa Domo Comunale e at a èssere a disponimentu de is tzitadinos pro cale si siat chistione subra sa limba sarda (normativa, cossigios chi pertocant règulas

de iscritura, furriaduras, consulèntzias didàticas e sighende a nàrrere). Custu servìtziu subra comunale dd'at a sighire sa Sotz. Coop. L'Altra Cultura de Aristanis e tocat is biddas de Baressa, Crucuris, Abas, Pau, Ollasta, Bobadri e Sini.

*Novas Baressesas* at a bessire prus o mancu una borta a su mese e s'at pòdere retzire inderetura in domo, cun una e-mail: bastat a ddu pedire mandende una punta de billetu eletrònicu a s'indiritzu

[serviziocultura@comune.baressa.or.it](mailto:serviziocultura@comune.baressa.or.it)

iscriende su nùmene, su sambenadu e "bollo retzire *Novas baressesas*". In prus, s'at pòdere lègere puru in sa bacheca comunale o agatare in medas atividades cummertziales de sa bidida o in sa biblioteca comunale



**Comunu de Baressa**

Provintzia de Aristanis

Sa redazione de *Novas Baressesas* est contivigiada dae su Servìtziu linguisticu sardu sighidu dae sa Sotz. Coop « L'Altra Cultura » e dae s'Assessoradu a sa Cultura de su Comunu de Baressa.

*S'isportellu linguisticu est a disponimentu de tzitadinos, maistros de iscola, professores e istudentes pro cale si siat informatzione, fundamentu, duda e crosidade subra de sa limba sarda, pro consulèntzias didàticas e pro cossigios chi pertocant is règulas de iscritura de su sardu.*

**Su Servìtziu est abertu:**

DIE	ORÀRIU
Ònnia martis	08.00 – 12.30 12.10 – 17.00 A chida a chida



**Comunu de Baressa**

Provintzia de Aristanis

# *Novas Baressesas*

☎ 0783-930049 Fax 0783-930118  
e-mail: [info@comune.baressa.or.it](mailto:info@comune.baressa.or.it)

Fògiu periòdicu de informatzione istituzionale de su Comunu de Baressa

**Responsabilidade e proprietade de su  
Comunu de Baressa (or)**

**Annu IV, n. 1**

Agabbadu su 8 de argiolas 2014

# Chistionamus de limba sarda

## Su sardu: limba o dialetu?

Sa lege narat ca su sardu est una limba.

Su sardu est tuteladu dae sa Costituzione italiana (art.6), dae sa Lege natzionale 482/99 e dae sa lege regionale 26/97.

Su sardu est una limba o unu dialetu?

Su sardu est una limba de minoria e est tuteladu de sa lege...



Su sardu est reconnotu dae s'Istadu italianu comente a "limba" paris a àteras ùndighe: albanesu, catalanu, germànicu, grecu, islovenu, croatu, frantzesu, francoproventzale, friulanu, ladinu o otzitanu.

Nch'est puru sa Carta europea de is limbas regionales o minoritàrias de su 1992, firmada fintzas dae s'Istadu italianu, chi amparat is limbas de

minoria comente a su sardu. In beridade comente a ainas pro sa comunicatzione intro de limba e dialetu no nche sunt diferèntzias mannas: narat unu aforisma nodidu ca "una limba est unu dialetu cun unu esèrtzitu e una marina". Ita bolet nàrrere? Bolet nàrrere chi pro comunicare tenent valèntzia ambaduas, pro comunicare si podent manigiare ambaduas, ma sa limba tenet s'istadu a palas chi ddi giae prestìgiu e fortza mannos.

Gràtzias a custas leges de amparu e prus che totu gràtzias a sa Lege 482/99, si podet nàrrere ca fintzas sa limba sarda tenet "unu esertzitu e una marina" chi dd'agiudant. E difatis gràtzias a custas leges si podent fàghere fintzas letziones in limba sarda in ònnia genia de iscola, dae s'iscola de s'infàntzia fintzas a is iscolas mèdias e a cussas superiores.

Difatis, gràtzias a sa tutela, candu s'iscrient is pipios a iscola, is babbos e is mammas podent inditare fintzas s'impreu de su sardu. E custa est una cosa de importu mannu pro is pipios nostros ca sunt is sardos de su tempus benidore!

Gràtzias a sa tutela si podet impitare su sardu comente a limba veicolare pro is letziones de istòria, matemàtica, geografia, educatzione tzìvica, iscièntzias in iscola in oràriu curriculare, cunforma a sa lege regionale 3/2009.

E gràtzias a sa Lege 482/99 si podet impreare su sardu fintzas in s'Universitàde e sunt giae istados fatos fintzas Master de formatzione de II livellu in paritzas limbas de minoria.

Gràtzias a s'amparu de sa limba in is riuniones de is consìgios comunales si podet chistionare in sardu puru e is atos ufiziales de su Comunu si podent iscrìere in limba sarda puru.

Fintzas s'istemma ufiziale de s'istitutzione podet èssere bilingue e is nùmenes de is biddas podent èssere in limba sarda paris a is nùmenes in italianu.

Sighende sa Lege 482/99, si unu bolet, podet torrare a su sardu su sambenadu e su nùmene suo.

Gràtzias a sa tutela de is limbas de minoria cun su giùighe de paghe si podet chistionare in sardu puru.